



**CONVENIO DE COLABORACIÓN CULTURAL ENTRE A CONSELLERÍA DE CULTURA
EDUCACIÓN E ORDENACIÓN UNIVERSITARIA E O CONCELLO DE MANZANEDA PARA A
REALIZACIÓN DO VII CERTAME CELTIBÉRICO DE BANDAS DE GAITAS E ENCONTRO
INFANTIL "MEMORIAL GABINO GARCÍA".**

En Santiago de Compostela, na sede dos servizos centrais da Consellería de Cultura,
Educación e Ordenación Universitaria, **13 XULL. 2016**

REÚNENSE:

Dunha parte, Román Rodríguez González, actuando en representación da Xunta de Galicia, en virtude do seu cargo de Conselleiro de Cultura, Educación e Ordenación Universitaria, para o que foi nomeado polo Decreto 15/2015, do 9 de febreiro de 2015, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia e o artigo 2 da Resolución do 8 de abril de 1991, pola que se publica o acordo do Consello da Xunta de Galicia do 27 de marzo de 1991.



Doutra, David Rodríguez Estévez, alcalde do Concello de Manzaneda, con CIF P-3204500-G, en virtude da súa condición de alcalde do citado concello segundo o disposto no artigo 61 da Lei 5/1997, da Administración Local de Galicia, do artigo 21 da lei 7/1985, do 2 de abril, reguladora das bases do réxime local e no artigo 24 do Real decreto legislativo 781/1986, do 18 de abril, do texto refundido das disposicións legais vixentes en materia de réxime local.

Ámbalas partes teñen plena capacidade para levaren adiante este convenio e,



MANIFESTAN:



Que as dúas entidades son conscientes da necesidade de actuacións de carácter sociocultural que permitan unha adecuada oferta, co obxecto de satisfacer as necesidades que en materia cultural teñen os habitantes desa comarca.

Que a Xunta de Galicia ten atribuídas funcións en materia de fomento da cultura, de acordo co establecido no artigo 27.19º do Estatuto de Autonomía, en consonancia co estipulado no artigo 148.1º.17ª da Constitución Española. Dentro dese ámbito competencial, a Consellería de Cultura, Educación e Ordenación Universitaria vén desenvolvendo dende anos atrás unha serie de actuacións encamiñadas á divulgación, información e promoción da cultura e para achegar o máis posible o noso patrimonio cultural á sociedade en xeral.

A Consellería de Cultura, Educación e Ordenación Universitaria quere acometer a realización de actividades de promoción e divulgación do patrimonio e da cultura galega. Mediante a programación das actuacións de recuperación da nosa cultura preténdese acadar unha maior eficacia na consecución destes obxectivos, por medio do desenvolvemento de actividades culturais e de fomento da cultura en lingua galega.

Con este convenio asegúrase a realización de diversas manifestacións da cultura galega levados a cabo por entidades que a queren dar a coñecer, mediante a súa promoción dentro e fora do noso país, coa organización de encontros e actividades que permitan un maior coñecemento dela.

O Concello de Manzaneda vén desenvolvendo un labor de continuidade no campo da promoción e difusión da cultura galega; neste caso trátase da realización do VII Certame Celtibérico de Bandas de Gaitas e Encontro Infantil "Memorial Gabino García", co obxectivo de difundir unha tradición musical por excelencia en Galicia en memoria do seu mentor Gabino García.



Por isto, para acadar unha maior eficacia na execución de actuacións, dado o interese común das partes asinantes, que teñen intereses coincidentes, é polo que asinan este convenio de colaboración, de acordo coas seguintes,

CLÁUSULAS

PRIMEIRA.- A Consellería de Cultura, Educación e Ordenación Universitaria comprométese a entregarlle ao Concello de Manzaneda a cantidade de 4.000 €, como contribución para a realización do Certame Celtibérico de Bandas de Gaitas “Memorial Gabino García”.

A cantidade de 4.000 € financiarase, con fondos propios, con cargo á aplicación orzamentaria 10.20.432B.760.1, dos orzamentos da comunidade autónoma galega para 2016, código de proxecto 201500370.

O Certame Celtibérico de Bandas de Gaitas “Memorial Gabino García”, que se celebra en Cabeza de Manzaneda, ten as súas fontes na Liga e na final da Liga Galega de Bandas de Gaitas que nacían no ano 1990 e chegaban a Manzaneda un ano despois de mans dun dos seus mentores Gabino García, é por elo que leva 26 anos e na súa memoria se segue celebrando dende o seu financiamento no ano 1995.

Xunto a este evento tamén naceu, como outras moitas, a Banda Municipal de Gaitas do Concello de Manzaneda; en ámbolos dous seguen e queren seguir sendo un referente no eido cultural, musical, folclórico e tradicional na Provincia de Ourense, en Galicia e fóra dela. Cando naceron as Bandas de Gaitas e se foron consolidando, tamén o fixeron actos e reunións para que elas puideran expor o seu bo facer.

Neste ano 2016 presentase un novo enfoque que consiste en tres fases a través dun Encontro Infantil e no propio Certame Celtibérico de Bandas de Gaitas que vai percorrer os concellos de Quiroga, Ribadavia e Manzaneda, como punto final da temporada.





Esta nova andaina no eido da educación musical no mundo das bandas de gaitas, pretende ser unha canle de promoción e de futuro para a formación integral e individual e colectivos de bandas de gaitas.

Este certame celébrase no campo de competición máis alto do mundo, onde os gaiteiros din sentirse nun espazo diferente onde tocar a gaita e no que sempre din querer recuncar.

Polo campo de competición de Cabeza de Manzaneda pasaron formacións de Suíza, Nova York, Barcelona, Valencia, Madrid, Asturias, Castela e León, Zamora. Este ano farao a do Centro Galego de Navarra, entre outras.

A continuidade do Certame Celtibérico de Bandas de Gaitas é moi importante para o fortalecemento da tradición musical levada a cabo no concello de Manzaneda despois de 25 anos consecutivos celebrando un evento destas características.

Coa realización deste certame, as bandas de gaitas poderán expoñer o seu bo facer coa exhibición e exposición no eido da interpretación musical nun campo ao aire libre; a participación das Bandas de Gaitas desenvólvese no campo da competición no que interpretan baixo un regulamento unha actuación na que tocan pezas de colleita propia, adaptacións de pezas emblemáticas do repertorio da música galega durante un tempo limitado.

Complementariamente á actuación fanse concursos de solistas de gaita, percusión, cuartetos, e pandeireta; tamén se van promover talleres e exposicións de instrumentos tradicionais, gaitas, tamboriles, pandeiretas así como publicacións do mundo da gaita entre outros; tamén forma parte do certame a chamada *Noite Celta* que consiste nunha actuación individual e conxunta de membros destacados das bandas de gaitas, varias bandas de gaitas xuntas e concertos de algún grupo de folk destacado para animar e completar o Certame propiamente dito.

O Concello de Manzaneda quere seguir mantendo e fortalecendo este evento pola importancia que ten para as Bandas de Gaitas, por ser o primeiro e único que se celebra fora do que á Liga Galega de Bandas de Gaitas se refire.





De acordo co artigo 26 da Lei de Subvencións non é posible promover a concorrência pública para a realización destas actividades, porque se trata dun certame que polas características mencionadas e polo entorno no que se celebra é único en España, e o Concello de Manzaneda, polo emprazamento do certame, o que dende o ano 1990 o vén organizando na honra do seu fundador “memorial Gabino García”.

Por todo o anterior, o Concello de Manzaneda é o que posúe a especificidade como beneficiario así como a da actuación subvencionada e o interese social da axuda concedida, sendo estas actividades con estas especiais características, as únicas que se van a desenvolver na nosa Comunidade Autónoma.

Así mesmo e de acordo coa planificación estratéxica realizada pola Secretaría Xeral de Cultura, para o ano 2016, e dada a especificidade e exclusividade das actividades a realizar baseadas en criterios obxectivos, a sinatura deste convenio encádrase dentro dos previstos nese plan.

SEGUNDA.- O Concello de Manzaneda comprométese, pola súa parte, a facer constar en toda a publicidade que xeren estas actividades –tanto impresa como audiovisual– a colaboración Xunta de Galicia, para o que utilizará a normativa da imaxe corporativa da Xunta de Galicia. Así mesmo comprométese ao cumprimento das obrigas contidas na Lei 9/2007, do 13 de xuño, de subvencións de Galicia e en especial as recollidas no artigo 11 desta norma. Tamén será de aplicación o establecido no Decreto 11/2009, do 8 de xaneiro, en canto non se opoña á lexislación anterior. Con carácter supletorio, será de aplicación o disposto na Lei 38/2003 xeral de subvencións e no seu regulamento, aprobado polo Real Decreto 887/2006, do 21 de xullo.

Os beneficiarios deberán dar cumprimento as obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.





O beneficiario ten a obriga de prestar colaboración e facilitar tanta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma e ao Consello de Contas.

TERCEIRA.- A Consellería de Cultura, Educación e Ordenación Universitaria comprométese a aboar ao Concello de Manzaneda a cantidade de 4.000 €, con cargo á aplicación orzamentaria 10.20.432B.760.1 dos orzamentos xerais da Comunidade Autónoma de Galicia para o ano 2016, código de proxecto 201500370.

En aplicación do Decreto 193/2011, do 6 de outubro, pola que se regulan especialidades nas subvencións ás entidades locais galegas, a Consellería de Cultura, Educación e Ordenación Universitaria poderá efectuar pagos anticipados, que suporán a entrega de fondos con carácter previo á xustificación, ata un importe máximo de 3.200 €. O pagamento restante, 800 €, pagarase no momento da completa xustificación polo concello do cumprimento da finalidade e demais condicións establecidas no convenio.

O Concello de Manzaneda estará obrigado a xustificar ante a Consellería de Cultura, Educación e Ordenación Universitaria o cumprimento da finalidade da subvención e a realización da actividade, mediante a presentación dunha conta xustificativa integrada pola documentación que se detalla a continuación:

a) Certificación expedida pola secretaría do concello, co visto bo do alcalde, relativa á aprobación polo órgano competente da conta xustificativa da subvención, na que se faga constar de forma detallada:

- 1.- O cumprimento da finalidade da subvención.
- 2.- Os distintos conceptos e contías correspondentes aos gastos totais soportados pola entidade beneficiaria imputables á actuación subvencionada coa seguinte relación: identificación do/a acreedor/a, número de factura ou documento equivalente, importe, data de emisión e data de recoñecemento da obriga polo órgano competente.





- b) b) Unha relación detallada doutros ingresos ou subvencións que financiarán a actividade subvencionada con indicación do importe e o seu orixe. Anexo II do convenio
- c) No seu caso, os tres orzamentos que se esixen en aplicación do artigo 29.3 da Lei 9/2007, de 13 de xuño, de subvencións de Galicia (modificado pola Lei 12/2011 de medidas fiscais e administrativas).

A data tope de presentación da documentación xustificativa da actividade é o 15 de decembro de 2016.

Segundo o establecido no artigo 4 do decreto 193/2011, é necesario que o Concello de Manzaneda cumpra co deber de remisión ao Consello de Contas das contas xerais de cada exercicio.

De conformidade co previsto na Lei 9/2007, de subvencións de Galicia, para efectos desta xustificación consideraranse os gastos realizados durante o ano 2016, dende o 1 de xaneiro ata a data tope de xustificación da axuda, que respondan á natureza da actividade subvencionada.

No caso de que o concello concerte con terceiros a execución total ou parcial da actividade obxecto do convenio, estarase ao disposto no artigo 27 da Lei 9/2007, de 13 de xuño, de Subvencións de Galicia e no Real Decreto Lexislativo 3/2011 do 14 de novembro polo que se aproba o texto refundido da Lei de Contratos do Sector Público.

O artigo 65.1 do Decreto 11/2009 polo que se aproba o Regulamento da Lei 9/2007 de 13 de xuño de subvencións de Galicia establece que os beneficiarios están obrigados á constitución de garantías cando estea prevista a posibilidade de realizar pagamentos á conta ou anticipados, non obstante, segundo o apartado 4 do devandito artigo, exonera de constitución de garantía, entre outros, as administracións públicas.





CUARTA.- O Concello de Manzaneda deberá presentar declaración responsable, para proceder á sinatura do convenio e despois para o seu pagamento, de estar ao día no cumprimento das obrigas tributarias e fronte á seguridade social e de non ter pendente de pagamento ningunha outra débeda coa administración pública da comunidade autónoma, segundo o establecido no artigo 10 da lei 9/2007 de subvencións de Galicia e no artigo 11 do decreto 11/2009, polo que se aproba o regulamento da Lei 9/2007 de subvencións de Galicia. Anexo I do convenio.

A sinatura deste convenio implica, de ser o caso, a autorización á Consellería de Cultura, Educación e Ordenación Universitaria para solicitar as certificacións acreditativas de que se atopa ao corrente das obrigas tributarias estatais e autonómica e da seguridade social, así como que non ten pendente de pagamento ningunha outra débeda, por ningún concepto coa Administración pública da Comunidade Autónoma de Galicia, de acordo co establecido na Lei Orgánica 15/1999, de 13 de decembro, de protección de datos de carácter persoal, disposición adicional cuarta da Lei 40/1998, de 9 de decembro, do imposto sobre a renda das persoas físicas e outras normas tributarias, e demais disposicións de aplicación.

QUINTA.- O Concello de Manzaneda comprométese a destinar os fondos percibidos ao obxecto concreto para o que foron concedidos. A Consellería de Cultura, Educación e Ordenación Universitaria poderá comprobar, cando o considere pertinente, a execución das actividades obxecto deste convenio.

SEXTA.- Créase unha comisión mixta de seguimento para aclarar as dúbidas derivadas da interpretación e execución deste convenio, formada polo secretario xeral de Cultura, da Consellería de Cultura, Educación e Ordenación Universitaria, e polo alcalde do Concello de Manzaneda.

SÉTIMA.- O incumprimento de calquera das cláusulas deste convenio constituirá causa suficiente para a súa rescisión, e así mesmo procederá o reintegro da





subvención cando concorra algunha das causas previstas no artigo 33 da Lei 9/2007, de 13 de xuño, de subvencións de Galicia.

OITAVA.- As partes asinantes deberán cumprir coas obrigas derivadas da entrada en vigor da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do convenio se publique no Portal de Transparencia e Goberno Aberto da Xunta de Galicia incluíndo os datos identificativos das persoas asinantes.

Así mesmo, o Concello de Manzaneda acepta e consente a remisión do convenio, logo da súa sinatura, ao Rexistro de Convenios da Xunta de Galicia.

De acordo co establecido no artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa, que introduciu diversas modificacións na Lei 38/2003, do 17 de novembro, xeral de subvencións, o contido deste convenio será publicado na Base de Datos Nacional de Subvencións, nos termos recollidos no artigo 20 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

Así mesmo, será obxecto de publicidade no Rexistro de Axudas, Subvencións e Convenios, ao abeiro do disposto no decreto 126/2006, do 20 de xullo e no decreto 132/2006, do 27 de xullo.



NOVENA.- Este convenio ten natureza administrativa. A xurisdición contencioso-administrativa será a competente para o coñecemento de posibles cuestións litixiosas que poidan suscitarse como consecuencia del.



DÉCIMA.- O período de vixencia deste convenio será dende a súa sinatura e ata o 31 de decembro de 2016, sen prexuízo de que as actividades subvencionadas sexan as realizadas a partires do 1 de xaneiro de 2016.



Este convenio obriga ás partes que o asinan ao seu cumprimento, e ambas as dúas sométense ao acordado en tódalas estipulacións. Esténdese en duplicado exemplar, no lugar e data arriba indicados.

O conselleiro de Cultura,
Educación e Ordenación
Universitaria



Román Rodríguez González

O alcalde do Concello de
Manzaneda



David Rodríguez Estévez